

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma kaihhruai nimina Council of Minister thukhawm chuan Armed Veng South-a Home Department ram chu Armed Veng East Presbyterian Kohhran hnenah hlan a remti.
- 2. Chief Electoral Officer Dr Lalrozama chuan Special Intensive Revision (SIR) of Electoral Rolls neih mekah Election Commission of India duh anga theihtawp an chhuah tur thu a sawi.
- 3. India leh Norway te chuan an thawhdunna ti sangin Green Strategic Partnership ah an hlangkai.
- 4. India-Norway Business and Researh Summit, Oslo khawpuia neihah Prime Minister Narendra Modia a tel.

<><><>

COUNCIL OF MINISTERS MEETING

Chief Minister Pu Lalduhoma kaihhruai nimina Council of Minister thukhawm chuan Armed Veng South-a Home Department ram chu Armed Veng East Presbyterian Kohhran hnenah hlan a remti.

Council of Minister thukhawm hian Agenda hrang hrang 18 an ngaihtuah a, heng zingah hian Higher Secondary school 12 dinhmun sang zawka hlankai turrin provincialise a remti a, heng bakah hian Aizawl Venglaia School Education Department ram chu Aizawl Venglai Local Council hnenah pek a remtih bakah Mizoram sawrkar Advisor atan Chief Secretaryt hlui Pi Renu Sharma rawih an remti bawk.

Agenda hrang hrang pawm zingah hian Higher & Technical Department atanga Agenda lut RUSA Scheme hnuai Asst Prof 58 te chungchang ngaihtuah zui a remti a, Mizoram Startup Policy, 2026, Mizoram Engineering Service Rules, 2026, Mizoram Regulation of Fireworks Bill, 2026, Aizawl City, Traffic Police Warden Scheme, 2026, Mizoram Water Information and Governance Bill, 2026, Mizoram Inner Line Pass Guidelines, 2026 te chu pawm a ni a, Aizawl Municipal Corporation Building (Amendment) Regulations, 2026 erawh ngaihtuah zui tura dah a ni.

(Desk)

<><><>

ADHOC SCHOOL

Mizoram Adhoc Aided High School Teachers Association huaihawtin Mizoram Sorkar-in School Provincialiazation a kalpui turah Sikul naupang neih zat tur bituk an phak loh avanga Provincialise theih loh zirna in aiawhte chu nimin khan Zarkawt-a Chief Minister Pisa panna Gate bulah an pungkhawm.

Mizoram Adhoc Aided High School Teachers Association chuan Sorkar chu Adhoc Recurring Grant-in-Aid hnuai High School tlemte chauh ni lo, School zawng zawng 'Power to relax' hmanga provincialise vek turin an ngen a. Student Enrolment Criteria tlawhchhana Provincialisation Rules siam chu an pawl member School zawng zawng huapzo a nih loh avangin an pawm thei lova; engti kawng mahin an thutlukna hi an tih danglam loh tur thu leh Sorkar-in PPP mode-a dah a tumna pawh an duh loh thu an sawi a ni.

(Desk)

<><><>

MIZORAM CHEMIST

Mizoram Chemists & Druggists Association chuan naktuk (Nilaini) hian All India Organisation of Chemists & Druggists hmalaknain ram pumah lungawi lohna lantir nan dawran khar dawn a, hei hi Mizoramah pawh an zawm ve dawn tih an sawi.

Hriattirna an tichhuhah-ah Mizoram Chemists & Druggists Association chuan, ram puma damdawi zuarten ONLINE PHARMACY duh lohna lantir nan All India Organisation of Chemists & Druggists hmalakin tun thla ni 20, Nilaini hian All India Strike neih tur a ni a, he hmalakna hi Mizoram chhunga damdawi zuarte pawhin an thlawp dawn avangin Nilaini hian Mizoram puma damdawi zawng zawng khar a ni dawn tih an sawi a. Mipuite chu harsatna an tawh loh nan an mamawh tur damdawi lo lei lawk turin an ngen a ni.

Damdawi dawr khar hian Hospital huam chhunga Canteen-te a huam ve dawn lo a ni.

(Desk)

<><><>

E-ROLL REVISION

Chief Electoral Officer Dr Lalrozama chuan Special Intensive Revision (SIR) of Electoral Rolls neih mekah Election Commission of India duh anga theihtawp an chhuah tur thu a sawi.

SP Conference Hall-ah nimin khan SIR chungchang inzirtirna hun hman a ni a. Dr Lalrozama chuan, India ram pumpuia a tahtawlin Special Intensive Revision (SIR) of Electoral Rolls neih mek niin Mizoramah pawh kalpui tan a lo ni ta a, mipui leh ECI beiseina tihlawhtling turin tan lak a ngai a ti.

Mizoram puma Election Officer, Electoral Registration Officer, Assistant Electoral Registration Officer leh District Level Master Trainer te tana buatsaih ni khat awh training hawnnaah hian CEO chuan Electoral Roll an khawih dawn avangin fimkhur hle a tul thu a sawi a. Mizoram khua leh tui dik tak ten vote an neih theihna turin, tihsual leh hmaih nei hauh lo a, uluk leh fimkhur taka hna thawk turin a fuih a ni.

Election Commission of India in May 14, 2026 khan SIR neih tur thu a puan tak avangin chak takin hmalak nghal a ni.

(DIPR)

<><><>

CHAMPHAI DISTRICT NGO

Champhai District NGO Coordination Committee thukhawm chuan Swadesh Darshan 2.0 hnuaiia Champhai leh a chhehvel hmasawna tur hrang hrang chu chak zawka hnathawh anih theih nan thuneitute hma la tura nawr ni se an ti.

Nimin khan Coordination Committee hi Champhai Sub-hqrs. YMA Zawlbuk, Champhai Dawrkaikawn, Tlangrawt ah an thukhawm a, Champhai District a Swadesh Darshan 2.0 hnuaiia Champhai leh a chhehvel hmasawna tur ruahman te chu zirchian a, a tul anga hmalak nise an ti a, Champhai leh a chhehvela kawngpui siam mek leh siam tur te chak taka hmalak a nih theih nan enfiah a, a tul anga hmalak nise an tih bakah National Highway No. 06 sial mek, Tuivawl leh Keifang inkara leidawh mek chu hnathawktuten an thawk muang lutuk nia hriain zirchian a, a tul anga thuneitute hnenah chak zawka hma la tura nawr nise an ti baw.

(Lahlupua PTC Champhai)

<><><>

STAMP DUTY

Sorkar tangka kum hmasa aiin kum 2025-26 ah Stamp Duty tlingkhawm chu cheng vaibelchhe 20.2 in a pung.

Ram lei leh hralh bakah inremna hrang hrang siam nana sawrkar a Stamp Duty tlingkhawm chu, kum 2024/25 khan vbc 13.45 a ni a, kum 2025/26 ah chuan vbc 20.2 in a pung tawh a ni.

Land Revenue & Settlement (LR&S) Department leh Stock Holding Corporation of India te chuan Non Judicial stamp paper aiah e-stamping hman a nih theih nan thawh hona thuthuthlung an lo ziaak tawh a. Revenue Minister Pu B. Lalchhanzova chuan Stamp duty chu State Sawrkar chan liau liau a nih vangin, a lakkhawm kawngah thahnem ngaih a tul thu a lo sawi tawh baw a ni.

Finance Department chuan kum 2026-27 chhungin stamp duty atangin cheng vbc 22.5 bituk in, e-stamping hman a nih dawn tak piah lamah Sub Division level a Sub Registration Office hawn a nih tak avangin Finance Department bituk zat hi khum ngei an inbeisei baw a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MUHCS

Mizoram sorkar hnathawh leh mipui nawlpui man chawia inziaklut tan MUHCS Card dil theih a ni.

Sawrkar thuchhuah tarlan danin, mahni awm hmun atangin muhcs.mizoram.gov.in portal ah lutin MUHCS Card hi dil theih a ni a, dil rual hian chhungkaw member tin Aadhaar Card leh thlalak - awm leh a chung lam lang fiah tak - 'upload' tel tur a ni.

Naupang kum 5 hnuai lam tan MUHCS Card siam a ngai lo a, a nu emaw a pa card emaw a hman thei ang. Approval (pawmpuina) hi Mizoram State Health Care Society-in a lo pek fel hunah card chu mahni in 'download' theih a ni ang. Mahni a MUHCS Card dil tur tan Mizoram State Health Care Society Youtube Channel-ah card dil dan kaihruaina video en theih a ni.

Civil Pensioner leh GIA employee tan tun dinhmunah MUHCS Card a la siam theih loh thung. Amaherawhchu, damdawi ina enkawl ngai an nih chuan scheme-a an inziahluna lehkha (Subscription form) hmangin MUHCS 2.0 hnuaiia hamthatna an dawng thei ang.

AB PM-JAY (Golden Card) hmang thei chhungkua tan Golden Card neih sa hmangin MUHCS hnuai hamthatna a dawn theih a, a hranpa a MUHCS Card siam a ngai lo a ni.

(DIPR)

<><><>

ART 371 G

Minister hlui Pu R. Tlanghmingthanga chuan Article 371 (G) chu Mizoram sorkar rem tihna lo chuan hman ngawt theih a ni lo tih a sawi.

Mizo Hnam Runa chhung inkhawmah nimin khan Pu R. Tlanghmingthanga, National Core Committee member chuan India leh MNF inremna avanga inhung bikna Article 371 (G) chu a hlu takzet tih a sawi a. India Parliament pawhin pass mah se, Mizoram Legislative Assembly rem tihna lo chuan hman ve ngawt a theih lova. Forest (Conservation) Bill 2022 MNF sorkar-in ram tana him lova a hriat avanga a lo hnawl tawh ZPM sorkar-in NGO leh Party-te rawn lova an pass (adopt) ta ngawtte hi a pawt takzet tih a sawi bawk.

PWD Minister hlui chuan, "MNF hunlai, PWD minister a nih tirh khan Aizawl kawngte chu a la chhe hle tih sawiin, nasa takin an siam tha tih a sawi a. Theihtawpin ram siamthat hna an thawh thu a sawi a ni.

(PR)

<><><>

INDIA-NORWAY

India leh Norway te chuan an thawhdunna ti sangin Green Strategic Partnership ah an hlangkai. Nimina Oslo-a Prime Minister Narendra Modia leh Norway PM Jonas Gahr te an inkawm hnuah inremna hi siam a ni a. Thuchhuah intawm an siamah thawhdunna thar hmang hian Energy thianghlim siam atanga sik leh sa chhe zel siamthatna leh tuipui lam eizawna atanga nungcha leh sik leh sa ti chhe tlema lawng siamna kawngahte an thawhdunna tihlen a ni a. Prime Minister Modia chuan India-ETFA Trade and Economic Partnership Agreement chu hmasawna leh hausakna tura a ruangam dintu anih thu a sawi a ni.

Hei bakah hian hruaitu pahnihte hian dan hmanga rorelna khawvel leh remna tura inbiakna leh indawrna kalpui uar an thlawp thu an sawi bawk a ni.

(Newsonair)

<><><>

PM MODI

India-Norway Business and Research Summit, Oslo khawpuia neihah Prime Minister Narendra Modia a tel. He hunah hian Norway Crown Prince Haakon leh Norway Prime Minister Jonas Gahr Store te pawh an tel a. Thusawiin PM Modia chuan Trade and Economic Partnership Agreement, TEPA ziah anih hnuah India leh Norway te insumdawntawna leh sum peipunna lam a thang chu lawmawm atih thu a sawi a. Ram pahniha mawhpurtu theuhten insumdawntawna chu dollar tluklehdingawn 100 a tlin theih nan tan la se a duh thu sawiin India rama hna maktaduai khat chuang siam tum pawh tihlawhtlin thuai ni se a duh thu a sawi a. India rama sum tam zawk rawn peipung turin Norway sumdawnge a sawm bawk a ni.

(Newsonair)

<><><>

PM IN ITALY

Prime Minister Narendra Modia chuan vawiin hian ni hnih cham turin Italy khawpui Rome a thleng dawn a. A cham chhungin Italy Prime Minister Georgia Meloni nen an inkawm ang a. Tuifinriat lama venghimna hnathawh leh inkalpawhna tha zawk neih danturte an sawidun ang.

(Newsonair)

<><><>